



Cuira, ils 11 da matg 2023

Communicaziun a las medias

**«Barat quadriling» – In champ da tempra speziala cun mintgamai ina tschintgavla classa da tut las quatter regiuns linguisticas da la Svizra**

La Lia Rumantscha sa legra da pudair realisar l'emprim «Barat quadriling» en furma da champ dals 8 fin ils 12 da matg a Mustér. Il champ ha lieu cun la participaziun da las scolas e sias scholaras e ses scolars da la tschintgavla classa dad Acquarossa, Appenzell, Cressier e Mustér. Quest barat tranter las quatter regiuns linguisticas e culturalas da la Svizra è vegnì organisà da la Lia Rumantscha sin iniziativa dal president actual dal Cussegl naziunal *Martin Candinas* e cun sustegn da l'agentura Movetia.

Quatter tschintgavlas classas cun totalmain 72 scholaras e scolars da Mustér (lieu ospitant), Appenzell (Appenzell Dadens), Acquarossa (Tessin) e Cressier (Neuchâtel) sa participeschan a l'emprim «Barat quadriling». Il fatg ch'il champ ha lieu durant il temp da scola lubescha a las scolas da porscher in'instrucziun da las segundas e terzas linguas a moda viva ed interactiva. Dals 8 fin ils 12 da matg 2023 han las scholaras ed ils scolars la chaschun da s'aprofundar en las quatter linguas naziunalas e d'augmentar la chapientscha per las autras cuminanze linguisticas. Durant las activitads linguisticas, sportivas, musicalas e culturalas pon els sa barattar e sviluppar in sensori per las differentas linguas e regiuns culturalas da la Svizra. La finiziun dal champ ha lieu ils 9 da zercladur 2023 a Berna. *Martin Candinas*, il president actual dal Cussegl naziunal, vegn a retschaiver las scholaras ed ils scolars en la Chasa federala ed als dar in'invista en il manaschi politic da la Svizra plurilingua.

## **Di uffizial en transmissiun directa cun Movetia**

Ils 10 da matg 2023 han las scholaras ed ils scolars dal «Barat quadriling» beneventà a Mustér giasts da la politica e la furmaziun. En preschientscha dal president actual dal Cussegl naziunal *Martin Candinas* han las scholaras ed ils scolars preschentà scenettas en las quatter linguas naziunalas e dà in'impressiun dal mintgadi en il champ pluriling. En ina curta transmissiun directa cun la conferenza annuala da l'agentura naziunala per barat e mobilitad Movetia ha *Martin Candinas* punctuà l'impurtanza dals barats linguistic en Svizra: «Il brat linguistic ei in grondius instrument per motivar nossa giuventetgna pil grond scazi linguistic dalla Svizra. Igl ei impurtont ch'els brats seigien aviarts ed accessibels per tut ils quater lungatgs naziunals.»

La Lia Rumantscha è satisfatga ch'il «Barat quadriling» chatta buna accoglientscha ed il sustegn da l'Uffizi federal da cultura e da l'agentura Movetia. Il secretari general ad interim da la Lia Rumantscha *Andreas Gabriel*: «Nus essan engraziaivels che la Lia Rumantscha po contribuir cun il 'Barat quadriling' a sensibilisar scholaras e scolars da tut las regiuns linguisticas per la situaziun linguistica en Svizra. Uschia essan nus persvas da pudair svegliar l'interess e pudair promover l'attractivdad da far barats da classa era cun il talian ed il rumantsch.» La finamira da la Lia Rumantscha èsi ch'il format dal «Barat quadriling» cuntinueschia ils proxims onns en las autras regiuns linguisticas da la Svizra.



## **Nov concept da barat linguistic per scolaras e scholars dal stgalim mesaun**

Cun il «Barat quadriling» preschenta la Lia Rumantscha in concept modern per il barat linguistic e cultural. Il nov gener da barat include tut las quatter regiuns linguisticas da la Svizra e surpasa uschia l'avischinaziun ordinaria che duas classas sa barattan tranter duas singulas regiuns linguisticas. Il «Barat quadriling» ha per l'ina la finamira da stgaffir punts tranter las quatter cuminanzas linguisticas da la Svizra e per l'autra da stgaffir vischinanza tranter la generaziun pli giuvna, independentamain da la lingua da partenza. Ultra da quai pon ils uffants meglierar lur enconuschientschas linguisticas e retschaiver novas inspiraziuns per lur via d'emprender autras linguas. Il «Barat quadriling» è vegnì organisà da la Lia Rumantscha sin iniziativa dal president actual dal Cussegl naziunal *Martin Candinas*. Il project vegn sustegnì finanzialmain da l'agentura naziunala per barat e mobilitad Movetia, la quala è era s'occupada da la publicaziun dal barat per las classas interessadas.